

# **Cikgu Louis Pulong Galas Cabaran Pertandingan Video Pendek PAK21 Peringkat Kebangsaan**



Penyertaan penulisan eseи dan video pendek tentang Pembelajaran Abad Ke-21(PAK21) mata pelajaran Sejarah Tahun 4 bertajuk Zaman Prasejarah telah memberi tuah kepada Cikgu Louis Pulong dari SK Kerupang kerana terpilih menduduki 10 senarai teratas peringkat kebangsaan.

Susulan itu, pihak Unit Pelaksanaan dan Prestasi Pendidikan (PADU) telah berkunjung ke SK Kerupang untuk membuat penggambaran penuh sesi PdPc bagi menghasilkan video dokumentari yang akan dikongsikan sebagai inspirasi kepada guru-guru di seluruh Malaysia.

Video tersebut juga akan dinilai bagi menentukan pemenang pertandingan PAK21 ini.

Selain itu video tersebut akan turut ditayangkan semasa majlis penutupan kempen PAK21 yang dijangka akan diadakan pada April nanti.

Sesi penggambaran pada 18 Mac lalu dilakukan oleh 13 krew profesional dari syarikat World Communications Network Resources yang telah dilantik oleh PADU.

Penggambaran melibatkan 35 murid yang dibimbing oleh Cikgu Louis. Sesi penggambaran telah berjalan lancar bermula jam 8.30 pagi sehingga 4.00 petang.

Antara aktiviti menarik semasa sesi penggambaran PdPc tersebut ialah simulasi ekskavasi arkeologi untuk mendapatkan bukti tinggalan sejarah bagi empat zaman masyarakat prasejarah.

Tapak ekskavasi telah direka khas oleh Cikgu Louis. Tinggalan sejarah bagi setiap zaman ditanam menggunakan warna tanah yang berbeza bagi memudahkan murid membuat perbandingan zaman kewujudan tinggalan masyarakat prasejarah. Tapak ini telah bertindak sebagai sebahagian dari Bahan Bantu Belajar (BBB) bagi memudahkan proses PdPc yang melibatkan simulasi kaedah arkeologi itu.

Cikgu Louis telah berjaya menerapkan elemen komunikasi, kolaborasi, kreativiti, pemikiran kritis serta nilai dan etika dalam aktiviti sepanjang penggambaran tersebut sesuai dengan saranan PAK-21. Murid-murid juga telah menunjukkan sifat ingin tahu dan keberanian yang tinggi.

Ini menjadi bukti bahawa pelaksanaan PdP yang terancang dan tersusun oleh Cikgu Louis berjaya menarik minat murid untuk mempelajari mata pelajaran Sejarah.

Di akhir sesi penggambaran, Cikgu Louis mengucapkan terima kasih kepada semua pihak yang terlibat atas kerjasama yang diberikan bagi menjayakan penggambaran pada hari tersebut. Tambahnya lagi, kejayaan terpilih

antara 10 terbaik peringkat kebangsaan bukan mudah dan amat bermakna baginya pada usia perkhidmatan yang baru mencecah 1 tahun.

Pihak Jabatan Pendidikan Wilayah Persekutuan Labuan (JPWPL) berharap agar Cikgu Louis Pulong akan berjaya dalam pertandingan ini dan mengharumkan nama Wilayah Persekutuan Labuan di peringkat yang lebih tinggi.

**Berita Oleh : Cikgu Mohd Nizam Yasim**



Penggambaran video pendek turut melibatkan murid-murid Sekolah Kebangsaan Kerupang

---

# **Kejohanan Majlis Sukan Sekolah WP Labuan**

# Melabuhkan Tirainya Dengan Penuh Dramatik



**Labuan, 24 Mac :** Kejohanan Majlis Sukan Sekolah Wilayah Persekutuan Labuan melabuhkan tirainya Jumaat lepas dengan penuh dramatik.

Kedudukan untuk menentukan juara keseluruhan bagi kategori sekolah menengah cukup sengit, dengan acara terakhir kejohanan menjadi penentu kemenangan.

Akhirnya dengan catatan rekod baharu kejohanan 3 minit 37.65 saat oleh atlet 4 x 400 Lelaki 18 Tahun, SMK Pantai sekali lagi muncul sebagai juara, disambut dengan kegembiraan dan tangisan para atlet, mahupun jurulatih.

SMK Pantai merangkul 17 pingat emas, 8 perak dan 14 gangsa, hanya dibezakan 1 pingat emas dengan SMK Mutiara yang meraih 16 pingat emas, 10 perak dan 7 gangsa.

Persaingan yang cukup sengit ini mengulangi skrip catatan pungutan pingat emas kejohanan tahun lalu, dengan SMK Pantai juga merangkul 17 emas dan SMK Mutiara meraih 16

emas. [Klik sini untuk berita MSSWPL 2018](#)

SMK Labuan kekal di tempat ketiga dengan 11 pingat emas, 9 perak dan 10 gangsa tetapi memperbaiki pungutan emas berbanding 8 emas yang dicipta pada tahun 2018.

Saingan sengit bagi kategori Sekolah Rendah juga tidak kurang hebatnya.

Dengan pungutan pingat yang sama iaitu 3 pingat emas, 2 perak dan 2 gangsa, akhirnya SKK SK Rancha-Rancha dan SK Lubok Temiang diistihar sebagai johan bersama, satu lagi tinta sejarah dalam kejohanan MSS WPL kali ini.

Syabas dan tahniah kepada semua yang terlibat secara langsung mahupun tidak langsung dalam menjayakan kejohanan Majlis Sukan Sekolah Wilayah Persekutuan Labuan 2019. Sesungguhnya **“Anda Semua Adalah Juara”**.

Majlis penutupan telah dirasmikan oleh Pengurus Perbadanan Labuan,  
Dato' Sri Haji Amir Bin Hussien.



Dipetik dari Buletin MSSWPL 2019 : Sekalung Tahniah kepada Petugas Buletin SK Bukit Kalam

[Klik Sini untuk Buletin Penuh](#)

---

# **SK Sungai Bedaun Meraikan Majlis Apresiasi Sukan, Hari Profesional dan Majlis Penghargaan Jasamu Dikenang**



Labuan – Sekolah Kebangsaan Sungai Bedaun (SKSB) mengadakan Majlis Apresiasi Sukan, Hari Profesional dan Majlis Penghargaan Jasamu Di Kenang serentak pada 14hb Mac 2019 Khamis.

Majlis Apresiasi diadakan setiap kali selesainya pelaksanaan suatu program atau aktiviti di SKSB.

Majlis ini diadakan bagi meraikan kejayaan pelaksanaan Kejohanan Sukan Olahraga serta memberi penghargaan kepada atlet dan ahli rumah sukan yang telah berjaya mendapat pingat dalam acara sukan dan juga perbarisan.

Semua ahli rumah sukan gembira dengan jamuan yang

diadakan oleh guru dan menerima pingat serta hadiah kemenangan dalam majlis tersebut.

Majlis di adakan di Dewan Permata dan Katin SKSB.



Ahli Rumah Cenderawasih merakamkan gambar kenangan bersama guru penasihat dan jurulatih dalam Majlis Apresiasi Sukan Olahraga

Menurut Penolong Kanan Ko Kurikulum Cikgu Mohd Aizam Bin Abdul Rahim, Majlis seumpama ini diadakan sebagai wadah penghubung antara guru-guru, anggota kumpulan pelaksana (AKP) dan murid-murid untuk berinteraksi dengan lebih progresif secara santai.

Ia bertujuan untuk menzahirkan rasa terima kasih dan tahniah kepada seluruh warga SKSB yang telah bersungguh-sungguh menyumbangkan tenaga dan buah fikiran dalam menjayakan Kejohanan Sukan Olahraga tempoh hari.

*"Pihak sekolah sentiasa mengingati jasa dan pengorbanan dalam setiap kerja yang dilakukan. Semoga majlis ini dapat meningkatkan motivasi dan keyakinan warga sekolah untuk lebih proaktif dalam melaksanakan program sekolah pada masa akan datang" . Cikgu Mohd Aizam*



Murid-murid yang berjaya meraih pingat dalam kejohanan sukan olahraga SKSB 2019 kelihatan ceria dan gembira bersama guru

Pada sebelah petangnya diadakan Hari Profesional di sebuah hotel terkenal di Labuan.

Guru Besar SKSB, Cikgu Dg. Sarifah Binti A.Mahmod berkata, Hari profesional pada hari ini di adakan di luar sekolah untuk memberi suntikan semangat dan nafas baru kepada semua anggota kerja di SKSB agar lebih bersemangat dalam bekerja.

Dalam majlis tersebut telah disampaikan watikah pelantikan di bawah Pengurusan Pentadbiran, Kurikulum, Hal Ehwal Murid (HEM) dan Ko-Kurikulum. Turut hadir ialah Puan Wiwik Iswandari Binti Sudirman, Yang Di Pertua (YDP) Persatuan Ibu Bapa dan Guru(PIBG), Cikgu Rina Farrina Binti Dalim, Penolong Kanan Pentadbiran, Ustazah Kamariah Binti Salim, Penolong Kanan Hal Ehwal Murid dan Cikgu Mohd Aizam Bin Abdul Rahim, Penolong Kanan Ko Kurikulum.

*“ Pihak sekolah amat menghargai seluruh warga pendidik dan AKP. Anda adalah nadi terhadap kecemerlangan sekolah. Sikap tidak berkira dalam melaksanakan tugas tanpa mengira penat, wang ringgit, masa dan tenaga*

*amat kami sanjungi. Semua pihak sentiasa melaksanakan amanah dan tanggungjawab yang diberikan secara profesional dengan penuh komitmen, cekap dan berkesan". Cikgu Dg. Sarifah*



Ustazah Anfal menerima watikah pelantikan daripada Cikgu Dg. Sarifah ( kiri) sambil diiringi oleh Puan Wiwik Iswandari ( dua dari kanan) dan barisan penolong kanan. Dalam masa yang sama turut diadakan Majlis Penghargaan & Jasamu Dikenang bagi menzahirkan penghargaan dan terima kasih kepada 6 orang guru yang berpindah.

Cikgu Sunah Binti Tahir, PK HEM telah berpindah ke SK Lubuk Temiang, Cikgu Muhammad Faiz Bin Abd.Fatah ke SK.Kerupang, Cikgu Nur Izzati Binti Ahadin ke SKJK Chi Wen, Cikgu Aqmal Bin Ekhlas ke SKK.St.Anne, Cikgu Ritzwandy Faezy bin Samsi ke SK.Lubok Temiang manakala Sahrum Bin Samlan telah bertukar ke Sektor Pendidikan Islam, Jabatan Pendidikan Wilayah Persekutuan Labuan (JPWPL).

Dalam ucapannya, Cikgu Dg. Sarifah mengucapkan terima kasih kepada semua guru yang telah berpindah kerana telah

memberikan perkhidmatan terbaik untuk sekolah sehingga SKSB berjaya meraih pelbagai kejayaan pada tahun 2018.

Sesungguhnya khidmat bakti yang dicurahkan tidak mampu di balas. Semoga mereka terus cemerlang di tempat baharu.

Semoga SKSB mekar terbilang.

**Berita Oleh : SK Sungai Bedaun**



Merakam kenangan : Cikgu Dg. Sarifah (tengah) , Cikgu Mohd Aizam (empat dari kiri), Cikgu Rina Farrina (empat dari kanan) dan Ustazah Kamariah (kanan) bergambar bersama guru-guru yang telah berpindah. Cikgu Sunah (tiga dari kanan), Cikgu Nur Izzati (dua dari kanan), Cikgu Muhammad Faiz (kiri), Cikgu Ritzwandy Faezy (dua dari kiri) dan Cikgu Aqmal (tiga dari kiri)

---

## **Lawatan Penanda Aras Dari**

# **PPD Ranau, Sabah Ke SK Pekan Satu**



**Labuan, 21 Mac –Sekolah**

Kebangsaan Pekan Satu telah menerima lawatan penanda aras dari PPD Ranau,

Sabah. Lawatan ini bersempena dengan Majlis Guru Besar PPD Ranau. Seramai 40

orang yang hadir bagi memeriahkan lagi majlis tersebut. Tidak ketinggalan juga seramai

15 orang dari Majlis Guru Besar Labuan yang turut hadir. Dua orang wakil

Jabatan Pendidikan Negeri Labuan turut serta ke majlis ini.

Majlis ini merupakan satu program untuk menyatupadukan dan merapatkan lagi hubungan baik semua guru-guru besar sekolah-sekolah rendah

di daerah ranau dengan guru-guru besar sekolah rendah di Wilayah Persekutuan Labuan.

Pn. Anita Shyamini S. Azman, Guru Besar SK Pekan Satu, menekankan kerjasama di antara dua pihak iaitu dari kalangan guru-guru besar adalah penting untuk menjamin keadaan sekolah yang kondusif sesuai untuk murid-murid belajar.



---

# World Speech Day 2019



Labuan, 15 Mac – ‘World Speech Day’ diadakan pada 15 Mac setiap tahun dimana Simon Gibson merupakan pelopor utama program ini dijalankan sejak 2015.

Pada tahun 2019, terdapat lebih 100 buah negara akan menyertai aktiviti pengucapan awam dengan adanya penglibatan dari pihak sekolah, institusi pengajian tinggi, tokoh-tokoh ilmuan dan NGO.

Sehubungan dengan itu, SMK Labuan telah menganjurkan World Speech Day 2019 pada 15 Mac, hari Jumaat yang lalu.

Majlis telah disempurnakan oleh Puan Khaziyati Osman, wakil rasmi Pengarah Jabatan Pendidikan WP Labuan dan dimeriahkan lagi dengan kehadiran tetamu-tetamu khas dari Jabatan Pendidikan W.P. Labuan, Pengerusi PIBG Smk Labuan, Tuan Haji Md. Yusof Hj. Chuchu, guru-guru dari sekolah-sekolah yang berlainan serta ibu-bapa pelajar.

Program kali ini dianjurkan oleh Bidang Bahasa SMK

Labuan, dengan kerjasama Toastmaster Club W.P Labuan, Jabatan Pendidikan W.P. Labuan dan PIBG SMK Labuan.

Penyertaan yang sangat menggalakkan daripada ahli-ahli Toastmaster Club Labuan, Persatuan Orang-orang Pekak (W.P. Labuan W.P. Deaf Society), para pelajar dari SMK Labuan, Smk Pantai, SMK Lajau, SMK Rancha-Rancha, SMK Mutiara, SMK Taman Perumahan Bedaun, SM MAIWP, dan SK. St. Anne.



Para peserta yang terdiri daripada pelajar-pelajar SMK Labuan bergambar di *photo booth* yang telah disediakan.

Pada World Speech Day kali ini, sedikit kelainan dan keunikan ditampilkan dengan penyampaian ucapan awam dalam tujuh bahasa iaitu, Bahasa Melayu, English, Mandarin, French, Arab, Tagalog dan juga bahasa isyarat (sign language).



Sofia Umaira bt. Ismail , peserta dari SMK Labuan sedang menyampaikan ucapan beliau dalam bahasa French.

Program ini direncanakan selaras dengan objektif ‘World Speech Day’ iaitu menggunakan kekuatan keunikan pengucapan awam sebagai wadah untuk meneroka dan berkongsi idea-idea baharu.

Ia juga dilihat sebagai satu usaha untuk meningkatkan kemahiran bertutur dan dapat menerapkan semangat ingin mencuba dalam kalangan pelajar SMK Labuan khasnya, dan seluruh pelajar di W.P. Labuan, secara keseluruhan. Pada kali ini, majlis telah berlangsung dengan lancar dan meriah.



Tuan Pengetua, Encik Ismail Abdullah, menyampaikan cenderamata sebagai tanda penghargaan kepada Susanna Koh, Pengerusi Kelab Toastmaster W.P. Labuan.

---

## **SPA Menyuntik Semangat Guru-guru Baharu Sekolah Menengah**



Seramai 11 guru yang baharu ditempatkan di sekolah-sekolah menengah di Labuan telah mengikuti kursus orientasi selama 2 hari mulai 14 dan 15 Mac 2019 di Bilik Dataran.

Kursus ini dianjurkan oleh Sektor Pengurusan Sekolah, Jabatan Pendidikan Wilayah Persekutuan Labuan.

Ketua Sektor Pengurusan Akademik (SPA), Encik Yusup bin Mohamad telah mengetuai pegawai SPA dalam pengisian slot selama 3 jam mulai jam 2pm hingga 5pm pada 14 Mac 2019.

Semasa menerang fungsi Sektor Pengurusan Akademik, Encik Yusup turut menyatakan hasrat dan harapan yang tinggi pihak jabatan kepada guru-guru generasi baharu untuk terus mendokong semangat LABUAN HEBAT: Guru Sayang Muridnya.

Guru-guru juga harus peka terhadap tuntutan perubahan sistem pendidikan negara serta fokus dan gerak kerja KPPM seperti yang terkandung di dalam Naratif Baharu Amalan Pendidikan.

Ketua Unit Bahasa, SPA, Puan Amiah Buah juga berkesempatan untuk menerangkan kepada guru baharu

mengenai kaedah menyediakan Rancangan Pengajaran Harian (RPH) yang betul.



Puan Amiah sedang menerangkan kaedah penyediaan RPH yang betul.

Selain itu, antara perkara yang telah diberi penekanan dalam kursus tersebut ialah berkaitan SKPMg2, KBAT dan PAK21.

Sepanjang kursus tersebut, para guru baharu terlibat secara aktif, bersemangat dan memberi respons yang sangat positif.

Di akhir kursus, Encik Yusup berbesar hati menyampaikan cenderahati kepada 5 guru baharu yang bertuah berbentuk sebuah buku Pembelajaran Abad ke-21 sebagai satu suntikan semangat untuk guru-guru baharu untuk terus mendalami konsep 4C1V dalam amalan PdPc masing-masing.

**Berita Oleh : Cikgu Mohd Nizam Yasim, SPA**



Encik Yusup menyampaikan cenderamata kepada guru baharu yang bertuah

---

## **Kejohanan MSSWPL 2019 Membuka Tirainya**



**Labuan, 19 Mac :** Kejohanan Olahraga Majlis Sukan Sekolah Wilayah Persekutuan Labuan (MSSWPL) 2019 membuka tirainya secara rasmi hari ini.

Majlis pembukaan telah dirasmikan oleh Pengarah Jabatan Pendidikan Wilayah Persekutuan Labuan, Encik Raisin bin Saidin, di Kompleks Sukan Labuan.

Pada hari pertama kejohanan, kelmarin 18hb Mac, tiga rekod kejohanan telah dipecahkan.

Nazerra Anak Jerah dari SM St Anthony telah berjaya mempertahankan emas dan memperbaharui rekod sendiri dengan catatan baharu 28.06 meter (rekod lama 27.09) dalam acara Merejam Lembing Perempuan Bawah 18 Tahun.

Md Alias Muhammad Junaidi dari SMK Labuan telah berjaya memecahkan rekod kejohanan 1500 meter Lelaki Bawah 18 Tahun Akhir dengan catatan baharu iaitu 4m:37:25s.

Mohd Norhakimin bin Noor Ashikan, SMK Labuan juga memperbaharui rekod sendiri dalam acara dengan lompatan 13.32 meter mengatasi rekod lama 13.02 meter yang

diciptanya tahun 2018.



Separuh Akhir Acara 100 meter Lelaki

Setakat jam 4 petang hari ini 19 Mac 2019, sebanyak 5 lagi rekod kejohanan MSSWPL 2019 telah dipecahkan.

1. Adam bin Kitli, SMK Labuan, 400 M Lari Berpagar Lelaki 18 Tahun Akhir – 58.84 s
2. Valendra Anting, SM Sains Labuan, 200 M Lari Berpagar Perempuan 15 Tahun Akhir – 32.18 s.
3. Aizul bin Husin, SSN SMK Mutiara, 200 M Lari Berpagar Lelaki 15 Tahun Akhir – 25.84 s.
4. Nur Athirah Aliah bt Ali Omar, SMK Pantai IBWS, Lempar Cakera Perempuan 18 Tahun Akhir – 27.41 m.
5. Ricci Ryan Robin, SKK SK St Anne, Lompat Tinggi Lelaki 12 Tahun Akhir – 1.51 m.

Pengerusi Bersama Pn Dona Binti Undoh (Pengetua SM St. Anthony) dan En. Rosli Bin Mohd Ali (Guru Besar SK Bukit Kallam) mengharapkan agar kejohanan olahraga MSSWPL kali ke-19 ini dapat dilaksanakan dengan jayanya dan mendapat sambutan yang meriah.

Pada tahun ini, Sekolah Menengah St. Anthony bersama Sekolah Kebangsaan Bukit Kalam adalah merupakan pengelola

bersama.

Selamat bertugas kepada semua Ahli Jawatankuasa Pelaksana Kejohanan MSSWPL 2019.

Kalau bukan kitani, siapa lagi? Ayuh ! sama-sama kita gegarkan dan meriahkan Kejohanan Majlis Sukan Sekolah Wilayah Persekutuan Labuan di Kompleks Sukan, Labuan bermula 18hb Mac sehingga 22hb Mac (penutup Kejohanan hari Jumaat sebelah pagi ).



Warga Jabatan Pendidikan Wilayah Persekutuan Labuan mengalu-alukan kedatangan anda ke Kejohanan MSSWPL 2019 ( 18 Mac – 22 Mac )

---

**Menyantuni Cakna Budaya  
Sekolah Penyayang :**

# Mesyuarat Agung PIBG SK Layang-Layangan



SK Layang-Layangan WP. Labuan telah mengadakan mesyuarat Agung PIBG bagi melantik Majlis Tertinggi untuk tahun 2019/2020 yang dilaksanakan pada 16 Mac 2019 bertempat di Dewan Surapit SK Layang-Layangan.

Mesyuarat kali ini dirasmikan oleh En. Embran bin Yunus, Penolong Pengarah Sains dan Matematik JPN WP. Labuan merangkap Pegawai Angkat Sekolah, selaku wakil rasmi Pengarah Pendidikan, Encik Raisin bin Saidin.

Mesyuarat ini turut dihadiri oleh Guru Besar SK. Layang-Layangan, Puan Hajah Dayang @ Saidah Bte Hj. Mohd. Yassin, YDP PIBG SKLL Encik Roziman Bin Hj. Sabtu dan Insp. Rose @ Norhashimah Binti Soumin Pegawai Perhubungan Polis Sekolah, Penolong-Penolong Kanan, ibu bapa dan guru-guru.

Dalam ucapan perasmiannya, Encik Embran menekankan tentang perlunya ibu bapa memahami konsep Pentaksiran

Bilik Darjah khususnya bagi murid Tahap 1 bagi menjamin kualiti pentaksiran sekolah dan kemenjadian anak-anak murid SKLL.

Beliau turut memuji perjalanan mesyuarat ini yang beliau sifatkan sebagai professional, teratur dan menunjukkan tertib pemilihan AJK PIBG yang baharu.

Beliau mengucapkan syabas dan tahniah atas kepimpinan Guru Besar dan yakin bahawa sekolah ini akan terus cemerlang dalam pelbagai bidang dengan adanya sokongan padu daripada ibu bapa yang berterusan.

Begitu juga harapan beliau terhadap kepimpinan PIBG yang baharu agar dapat menambahbaik lanskap kemenjadian dan keberhasilan murid-murid sekolah ini.

Sebelum itu Guru Besar selaku penasihat persatuan ini dalam ucapannya mengingatkan semula tentang fungsi dan peranan PIBG, KSIB, PIBKS dan SdK di sekolah serta memperlihatkan kejayaan-kejayaan yang telah diperolehi oleh sekolah ini khususnya dalam Pelibatan Ibu Bapa Komuniti dan Swasta (PIBKS) yang mana SK. Layang-Layangan telah diiktiraf sebagai Johan Pertandingan Pameran PIBK dan juga menerima pengiktirafan sebagai Sekolah Cemerlang PIBK peringkat negeri 2018.



Guru Besar menyampaikan cenderahati kepada perasmi Manakala beliau sendiri turut dinobatkan sebagai “Tokoh Guru Besar Inspirasi PIBK 2018” peringkat negeri.

Beliau juga berkongsi dasar dan amalan-amalan terbaik PIBK di sekolah ini sebagai contoh keterlibatan murid-murid Maahad Tahfiz Marinding dalam program Kem Bestari Solat dan Tasmiq.

Pelibatan ahli-ahli akademik menyumbang kepakaran ilmu dalam subjek Matematik dan Bahasa Inggeris juga kesungguhan ibu bapa mencantik dan menghiasi kelas-kelas telah memberi Impak kepada sekolah dan mendapat Naib Johan pertandingan Kelas dan Sekolah Ceria, menerima piala pusingan dan rm 500 daripada Tuan Pengarah Pendidikan WP. Labuan.

SK. Layang-Layangan juga telah mendapat anugerah pengurusan BOSS Cemerlang 4 Bintang yakni pengurusan Buku Teks daripada Kementerian Pendidikan Malaysia baru-baru ini.

Beliau berharap dan mengajak semua ibubapa melibatkan diri dalam menceriakan lanskap sekolah memandangkan sekolah ini tercalon untuk pertandingan 3K dan Sekolah Lestari – Anugerah Alam Sekitar pada tahun ini.

Disamping itu beliau juga menyentuh tentang perkembangan semasa dalam pendidikan serta hala tuju sekolah ini bagi tahun 2019 dengan pelbagai program dan intervensi bagi mencapai peningkatan UPSR tahun ini.

Beliau juga mengalukan kehadiran ibu bapa ke sekolah dan melebarkan konsep sekolah penyayang dan keterbukaan kepada ibu bapa kerana sekolah adalah milik masyarakat dan berharap lebih ramai dari kalangan ibu bapa dan komuniti akan turut serta dalam “Hari Keusahawanan” yang bakal berlangsung April nanti dan juga majlis ‘Opening Ceremony Bilik PIBKS’.

Kehadiran ibubapa dalam mesyuarat kali ini juga menggalakkan dan melebihi sasaran sekolah. Ibu bapa juga bermurah hati menyediakan juadah untuk mesyuarat ini.



Guru Besar menyampaikan sijil penghargaan dan cenderamata kepada En. Jumali Bin Kastari YDP PIBG

Beberapa keputusan penting telah dicapai antaranya kadar sumbangan ibubapa kepada tabung PIBG bagi tahun 2019 dan hal-hal berkaitan kebajikan dan keselamatan murid. Juga mesyuarat memutuskan kepada mana-mana ibu bapa yang tidak dapat hadir ke mesyuarat Agung PIBG dikehendaki membayar rm 10 sebagai "Wang Ihsan Pengganti Diri" kerana ketidak hadiran mereka.

Pada mesyuarat ini juga ibu bapa setuju untuk sama-sama menjayakan "Program Ziarah Cakna" iaitu lawatan guru-guru ke rumah murid-murid.

Ziarah Cakna ini bagi memperluas konsep sekolah penyayang dan memperkuuh hubungan antara sekolah dengan ibu bapa, penjaga dan murid-murid yang dijalankan sepanjang tahun ini.

Amalan ziarah guru ke rumah pelajar terpilih adalah untuk menyantuni golongan ibu bapa atau penjaga mereka dan

memahami latar belakang keluarga mereka serta berkongsi pandangan bagi memastikan kemenjadian murid.

Sebelum itu pemilihan AJK baharu telah dijalankan oleh En. Ismail Bin Abdul Hamid selaku pengurus sementara. YDP PIBG bagi sesi 2019/2020 ialah Encik Jumadi Bin Kastari, NYDP Encik Mohd. Shahredzuan Bin Salleh, Cikgu Nur Alif Syafina selaku setiausaha dan Puan Murnie Binti Mohd. selaku naib Setiausaha dan Cikgu Norlinda Paman selaku Bendahari.

Selaku YDP PIBG Encik Jumadi berharap agar hubungan kukuh antara sekolah dan ibubapa yang sedia terjalin dapat dijaga demi kemenjadian dan keberhasilan anak-anak di SK Layang-Layangan khususnya dan di W.P.Labuan amnya.

**Berita Oleh : SK Layang-Layangan**

---

## **Kembar Pengakap Raja SMK Labuan Cemerlang Dalam SPM**



Adik beradik kembar Yap Joewin dan Yap Melwin merupakan calon SPM 2018 SMK Labuan yang telah berjaya mencapai keputusan cemerlang.

Yap Joewin telah berjaya mencapai semua A dalam SPM iaitu gred A+ dalam mata pelajaran Bahasa Melayu, Bahasa Inggeris, Sejarah, Matematik, Matematik Tambahan, Fizik, Kimia dan Biologi. Gred A dalam Pendidikan Moral serta A- dalam Grafik Komunikasi Teknikal dan Bahasa Cina.

Adiknya Yap Melwin juga mencapai keputusan yang cemerlang iaitu 7A 3B. Iaitu pencapaian gred A+ dalam Sejarah, gred A dalam Bahasa Melayu dan Matematik, serta A- dalam Pendidikan Moral, Matematik Tambahan, Grafik Komunikasi Teknikal dan Bahasa Cina, mendapat gred B+ dalam Bahasa Inggeris dan Kimia, serta gred B dalam Fizik.

Yap Joewin mencapai 7A dalam UPSR serta 10A dalam PT3, manakala Yap Melwin mencapai 6A dalam UPSR serta 6A dalam PT3.

Anak kembar kepada pasangan  
Yap Keng Soon seorang peniaga, serta Lau Chin Ying  
seorang guru Penolong Kanan  
Kokurikulum SMK Taman Perumahan Bedaun WP Labuan,  
mempunyai cita-cita yang  
berbeza. Yap Joewin bercita-cita menjadi seorang Jurutera  
Mekanikal, manakala  
Yap Melwin ingin menjadi seorang guru Grafik Komunikasi  
Teknikal.

Kedua-duanya aktif dalam aktiviti pengakap dan telah  
diberi matlamat untuk mencapai anugerah Pengakap Raja  
sebelum mereka tamat tingkatan lima.



Cikgu Lau Chin Ying, Yap Joewin, Encik Ismail, Yap Melwin Ini merupakan cabaran yang sangat besar kerana persiapan untuk mencapai Pengakap Raja memerlukan mereka melalui beberapa kursus dan ujian, yang terpaksa berjalan seiring dengan usaha untuk mencapai kecemerlangan dalam akademik juga.

Berkat semangat dan dorongan ibu bapa, bimbingan guru pengakap SMK Labuan Cikgu Atiqah Syahidah Abd Rahman serta semua jurulatih daripada Pesuruhjaya Pengakap Negeri WP Labuan, akhirnya mereka dianugerahkan Pengakap Raja pada 10 Nov 2018 yang disampaikan oleh Ketua

Pesuruhjaya Pengakap Negara , Y.Bhg. Mej. Jen. Prof Dato' Dr Haji Mohd Zin bin Bidin.

Kejayaan mencapai keputusan cemerlang dalam SPM membuktikan bahawa penglibatan dalam aktiviti pengakap tidak menjaskan persiapan akademik mereka, malahan dapat memberi lebih kekuatan dan keyakinan untuk mencapai kejayaan dalam kedua-dua bidang.

Kedua-dua beradik ini mengucapkan terima kasih dan penghargaan terutama kepada ibu bapa, guru-guru SMK Labuan, serta jurulatih-jurulatih daripada Pesuruhjaya Pengakap Negeri WP Labuan yang gigih membimbing mereka hingga berjaya.

Mereka berharap agar kejayaan dalam SPM serta gelaran Pengakap Raja yang mereka perolehi akan menjadi pembakar semangat untuk mereka mencapai kejayaan lebih besar dalam kehidupan akan datang .

**Berita Oleh : SMK Labuan**

---

# **Mesyuarat Agung PIBG SK Patau-Patau Medan Perkukuh Hubungan Ibu Bapa dan Sekolah**



**Labuan, 17 Mac :** Sekolah Kebangsaan Patau-Patau (SKPP) telah mengadakan mesyuarat agung PIBG bertempat di Dewan Terbuka SK Patau-Patau.

Mesyuarat kali ini dirasmikan oleh Pegawai Angkat Sekolah, Encik Sazali bin Dinin selaku wakil rasmi Pengarah Pendidikan, Encik Raisin bin Saidin.

Mesyuarat ini turut dihadiri oleh Guru Besar SKPP, Encik Abdul Rahman bin Salim dan YDP PIBG SKPP, Encik Mohd Nizam bin Yasim.

Di dalam ucapan perasmian, Encik Sazali menekankan bahawa sekolah adalah milik masyarakat dan berharap agar hubungan ibubapa dan pihak sekolah sentiasa kukuh bagi menjamin kualiti sekolah dan kemenjadian anak-anak murid SKPP.

Dalam ucapan Guru Besar, beliau turut berkongsi dasar dan perkembangan semasa pendidikan serta hala tuju sekolah untuk tahun 2019.

Selain itu beliau turut memaklumkan SKPP menyasarkan semua murid mampu mencapai penguasaan minimum (MTM) dalam UPSR tahun ini.

Pelbagai acara sampingan diadakan sempena mesyuarat kali ini. Antaranya ceramah berkaitan kepentingan saringan kesihatan dalam kalangan murid oleh Dr. Nur Anisah binti Hassan, pegawai perkhidmatan kesihatan sekolah dari Jabatan Kesihatan W.P.Labuan.

Di samping itu, PIBG juga menganjurkan program BELI & SUMBANG kertas A4 untuk kegunaan sekolah. Acara jualan amal pakaian terpakai untuk pembiayaan pembelian PA System baharu turut diadakan.



Encik Rahman bersama ibu bapa : Program Beli dan Sumbang Kehadiran ibubapa dalam mesyuarat kali ini juga agak menggalakkan dan mencapai sasaran sekolah. Beberapa keputusan penting telah dicapai antaranya kadar sumbangan ibubapa kepada tabung PIBG bagi tahun 2019 dan hal-hal berkaitan kebajikan dan keselamatan murid.

Pada tahun ini tiada pemilihan Ahli Jawatankuasa baharu dijalankan. YDP PIBG bagi sesi 2018/2020, Encik Mohd Nizam berharap agar hubungan kukuh antara sekolah dan ibubapa dapat ditingkatkan dari semasa ke semasa demi anak-anak di Wilayah Persekutuan Labuan.

## Berita Oleh : SK Patau-Patau

